

Directora di Arubahuis, Desiree Croes a haci entrega di "Studentenagenda 2010/2011"



ORANJESTAD- Via programanan di television por a mira con cada estudiante nobo di Aruba cu a yega Hulanda a ricibi como regalo di gobierno e studentenagenda 2010/2011 como un regalo di bon bini na nan cas leu di cas. Na Arubahuis tabatin e siman cu a pasa e presentacion oficial di e studentenagenda aki dor di directora mr. Desiree Croes y esnan cu a yuda haci e proyecto aki bira realidad. E agenda ta un idea inovativo di director di Arubahuis, mr. Desiree Croes. E team cu a traha riba e agenda aki ta e directora mes, Oslin Trimon, Rosalinda Croes, Addonsito Croes, Sydney Kock, Ivonne Navas y Leonie Nicolaas. Den su speech sra. Croes a gradici tur esnan cu a yuda haci e agenda aki posibel. E agenda a wordo parti den varios seccion. E ta un agenda unda e estudiante por traha su rooster y anota tur e dato- y notanan cu e ta haya necesario. Tambe e estudiante por nota tur resultado logra den 2010/2011.

Potretnan Den e agenda tin potret di varios sitio turistico y unico di Aruba. E idea ta pa ora e estudiante habri e agenda e por comparti e beyesa disu isla cu su compañeronan di estudio. E potretnan cu a wordo usa tabata ta cortesia di David Wing www.CaribbeantouristFM.com, Garrick Lacle, Paul van Driel, Nico van der Ven y Aruba Tourism Authority (ATA). Mentornan & informacion Den e agenda e estudiante ta haña informacion balioso di tur mentor y e stad na unda e ta bay studia. Cada mentor a pone e reglanan cu tin pa cu entregamento di e resultadonan y bishita

cu su persona lo ta haciendo na e estudiante. Tambe tin informacion di fundacionnan y eventonan cultural Arubano. En corto ta duna un splicacion riba algun di e eventonan aki y tambe di e bandera di Aruba. Receta

Un parti di e agenda a wordo dedica na recetanen cu ta facil pa traha. Asina tin receta con pa traha cheese-balls, pork-chop den sauce di tomati, salada di batata, bolo di apelmoes, curry chicken cu macaroni y hopi mas. Tanto e ingredientenan como e forma pa traha e cuminda ta wordo splica den e agenda.

"CHELO"

Pa siña e estudiante na un forma gracioso un tiki di e bida na Hulanda un "stripfiguur" a wordo inventa cu ta yama "Chelo". Chelo ta un estudiante nobo cu ta haña su mes confronta cu algun situacion unda e tin cu siña bisa NO.

CHELO ta haña cu hopi cos ta DI MAS pa su persona. E creador nan di CHELO ta directora Desiree Croes, Addonsito Croes y Luis Croes. E ilustrador ta Luis Croes.

Reacion y agradecimento E reaccion di nos studiantenan tabata uno masha hopi positivo. Den e stadnan cu Desiree Croes a bishita nos studiantenan a tende esaki for di nan. Tambe e interes di parti di studiantenan cu tin mas aña na Hulanda ta enorme pa por tin un ehemplar.

Danki ta bai di parti di e team na e sponsornan di e agenda aki. Entre otro ATA-Den Haag, Rabobank, Boogaard Assurantien BV, Holland Caribbean Line, Deloitte y HSL.

E team ta spera cu e studiantenan lo sa di haci bon uso di e studentenagenda 2010/2011.